



E TATOU TE AUALOFA ATU AI I LO TATOU TAMA. AFIGA AKIEPIKOPO ALAPATI LUI MATAEILIGA.

AKIEPIKOPO PULE'AGA SAMOA MA TOKELAU

TUSI FAITAU: 2 SAMUELU 1:1-27

MATUA: 2 SAMUELU 1:27

“AUE! UA MALILIU TOA, UA MAUMAU AI A'UUPEGA OLE TAUA.”

AUAU O MANATU: “ AUE!, UA MALIU LE TOA, E LE O MAUMAU A'UUPEGA A MOSENILO.”

Tatou tatalo: Ia malie lava ia te oe upu o lo'u gutu, ma mafauauga o lo'u loto, o oe o lo'u olataga ma le na te togilaina a'u..Amene..

Ole tusiga o lo'o i ai, ole upu “AUE “ o lo'o fa'ailoa ai le upu-fofo. O Tavita lea i lana lagi o auega, ina ua ia maua le tala fa'anoanoa ma le tala fa'avauvau, le tala lea na sau ma le pologa, fai mai ua fasiotia Tavita ma Ionatana ile taua.

O lē na apepele i ai lona loto, pei ole ala lea na ia fa'apea ane ai, “ e tatau i lenei pese, o so'o se Tupulaga o Isaraelu, i totonu o Ierusalem ma Isaraelu uma, e tatau ona a'oa'o i ai le pese lea, e tatau ona a'oa'o i ai lenei fati. O Tupulaga fai mai, e ao ona matua'i a'oa'o'oina, ina ia ola ma iloa tagata taua, ia iloa tagata aogā , tagata na mau ai le Nu'u ma manuia ai le Malö.

Se'i silasila ile aputiputi ole loto o Tavita ia Saulo ma Ionatana. O lona taofi, ole fasiotia o'i laua, ole to'ila-lo lava lea ma le lafoa'ina ole Malo o Isaraelu, ma le lē toe i ai o se aogā o a'upega sa ia te'i laua. O le ala lea sa ia manatu ai, ma o'o o'ona tigā alofa, ma ia fa'apea ane. “Aua ne'i avatua le tala ole maliu o Saulo ma Ionatana ne'i iloa e Kata ma Asekelona, ina ne'i fiafia fafine ma o latou faifai ai ile mamalu ole Malo o Isaraelu. O Asekelona ma Kata o nisi ia o Aai o Filisitia, ae ona o Filisitia ole fili numera tasi lea o Isaraelu, e i ai le talitonuga ma le masani, a o'o ina si'itua o latou autau, ma siitua o latou tama tane, ona tapua'i lea o latou fafine i o latou fale, latou te va'avaai atu po'o fea le ituaiga e aga'i mai ai le pologa e ta'u mai le tala ole taua. Tala ole manumalo, po'o tala ole to'ilalo. Afai e o'o mai le pologa ma le tala fiafia ua manumalo, ona o lea i fafo o fafine, e ta a latou sumepalo ma savavali i magaala ma pepese fiafia, ole fa'ailo lea ole latou tali atu ile tala fiafia, le tala lea ua sau ma le pologa, ua manumalo i latou.

Pei o i lea e fa'avae ai le lagona lea. Manatu Tavita, aua lava ne'i toe tupu se mea fa'apea. Aua ne'i sisiva pe faifai le to'ilalo o Isaraelu, e fafine ma tagata o Filisitia, o tagata e le'i fa'amamāina. Na o'o lava ile mauga o Kilepoa, fai mai ua fetu'u e Tavita. Ole mauga lea e fa'apea e lausiusi ma ola lelei ai laau. O laau e fa'aogaina e osi ai taulaga. Ole vine, ole olive, ma le saito. Ole mauga e lafulemū ma lanu lau'ava. Ae fai mai ua fetu'u e Tavita. Ia 'aua ne'i toe tō i ai se ua, ia liua e fai ma mauga tula, ia fa'alaulau-toafa lona fu-ata. Ioe le au pele, le leai o se lanu lau'ava , ole faailoga ole leai o se ola. Ole faailoga ole fetu'uina. Ole mauga na lafoa'ina ai le talitā a le toa peisea'i e le'i fa'au'uina. Ona manatu lea o Tavita, ua pei se talitā a se toa ua ta'oto e leai se aogā. Ole a o'o ina pala ma le toe faaogaina e o'o lava ile fa'avavau.

E i ai le masani a o'o ina sauni e si'itia o taua, fai mai e matua u'u le talitā ina ia i'ila. Ole mea muamua afai e fetaia'i ma le fili, tasi le togafiti fai e segia ai mata ole fili ma fa'afaigofie ai ona maua. Lona 2- ia aua ona faigofie ona tu ai le tao pe afaina i se pelu. Ole tao ma le aufana, ole talita ma le pelu, o mea aupito silisili ia ona latalata i so'o se toa po'o so'o se fitafita. A o'o ina malolö, e na te toe va'avaai po'o lelei ina ne'i faafuase'i mai ona osofa'i e le fili, a'o saunia pea o ia.

Mea ia ile manatu o Tavita, peisea'i ua ta'atia ua le toe fa'aogaina. Na ona "AUE " lava fai mai "Ua maliliu toa, ua māumau ai a'upega ole taua," uma loa. O lo'o atagia mai pea i'i ona so'otaga fa'aletagata ma ona lagona ia Saulo ma Ionatana.

O lea ua tuua le malo e lana Afioa ile AKIEPIKOPO ALAPATI LUI MATAEILIGA, ole Tamā ole PULE'AGA FA'AAKIEPIKOPÖ o Samoa ma Tokelau. Ole SILI'AGA, ole Ekalesia Katoliko i Samoa. O lo tatou Tama. O le Ta'ita'i ma le Auauna fa'amaoni a le Ali'i. Mo a'u, ou te fa'apea atu " Aue ou te ofo," e le ona ole oti, auā tatou te oti ma maliliu uma. Ae ou te ofo, ona o a'upega a le Auauna lea, auā e le'i māumau. Tatou te silafia uma ma iloaina e le'i tau le toa lea i se a'ufana po'o se pelu, po'o se tao ma sona talitā e pei o Saulo ma Ionatana. Leai, o ana a'upega faapitoa na ia tau ai le taua a'o galue ai i lona valaauina ma le galuega pele a le Atua lona matai. Ole Alofa, onosa'i , ole fa'apalepale, o lona tauivi ma lona finafinau, o lona fa'amaoni ma lona loto atu ma lona fa'atuatua i lona Ali'i o le na valaauina o ia. O le talitā lea ma le maluāpapa o lona Ali'i o Iesu Keriso. Ua tatou faalogologo ma maimoa ile tele o molimau ese'ese o lona soifua fa'aauauna Ositaulaga a Iesu. Ua le gata i Aiga, a'o uo ma le Pule'aga. Sa o'u maitauina ua o se lolo ua ao lona manogi. Le lagaali, le mosooi, ma le anoano o laau. Na ou tomanatu ma fa'apea, pe ole a fa'apefea nei ona galuea'ina ina ia maua ai se u'u lelei, se u'u e sasala ma nanamu lelei e u'u pātapātaina ai. Ua ou tomanatu fo'i, ole galuega aupito i tele ma faigatā lea o lo'o taōto nei. O le tagata ole 'ana tu'ufa'atasia manogi ole lolo lea. Fai mai ole Toa, e agamalu ma loto mauualalo, e lē fa'alologotigā. Sa ia matuā loto atu i le galuega a lona matai. Fai mai ole to'o ole savili pe a o'o ina lukaluka le gataifale. Ole Tāfā i fia, a'o le sili'aga mo le Pule'aga Faaakiepikopo Samoa.

Pe a fa'apefea nei ona aumai nei mea ma māta'aga e tele e tu'u i se mea e tasi ina ia aogā pea mo i tatou. Manaia le vaai atu ile aoina ole lolo, a'o le mea faigatā, e faapefea ona maua se suau'u lelei? Ole faia'oga atamai ole Telosia ma le Mata'upu Silisili. Upu a le Atua ma le talafa'asolopito ole Ekalesia, o lana vaogagana e le'i pa'ulia ae ua osaosa ai fa'afa'alumaga a tatou ola fagota. Ioe le tatou Kapelenisia e, ma le tatou aufaitau o lenei Auaunaga. Ole ala lea o lo'u taofi, ua na ona tu'umalo lava o AKIEPIKOPO ALAPATI LUI MATAEILIGA, "**ae le o māumau ana a'upega,**" A lenei, ua maua'a lo tatou fa'atuatua ma taotoga lelei le Ekalesia i Samoa, aemaise le fa'atupulaia o tama fanau ile Tofiga Ositaulaga e le o naumati le Ekalesia, ona o lana ta'ita'iga lelei. O lana a'upega ole onosa'i ma le fa'apalepale, o lona tauivi ma lona lotomau i mea Silisili ma lelei mo le fa'atalaleleina o Samoa ma le Ekalesia. Ioe, ua tatou molimauina fua vaaia o lana tautua lelei.

Fai mai le fati ole Auega a Tavita, " afafine o Isaraelu e, ina fetagisi ia outou, a Saulo lea, o lē na fa'aofu ia te outou i ie mūmū. O lē na teuteua outou i ofu. O auro matagofie. Le Pa'ia i Aiga i ona itu tetele ma itu taulagi, le Pa'ia ole Pule'aga Faaakiepikopo Samoa ma Tokelau, le Paia ile tatou Kapelenisia Samoa i Ueligitone nei, ia tatou loto tetele. Afai fo'i ua tatou mafatia ma tigā fa'anoanoa, ua sala lava ina tatou mafatia. Ae fai mai le isi talitonuga fa'afoma'i, o se tasi lenā o valaau e ave'ese ai fa'anoanoaga mai totonu o'i tatou.

Tele uiga ole mūmū, ole uiga ole mamalu, ole uiga ole fa'aeaina. Uiga na sa seei ai le auauna lea, o tofiga ma ona tiute, o lona tomai ma le poto sa ia sasa'aina atu, FA'AFETAI. Sala lava la ina o tatou mafatia. O auro o mea e taugata. Fai mai Tavita, o Saulo lea na ia avatu ia te outou.

Le Paia e ile tatou Kapelenisia, ole a se fa'asoa atu, le a se a'upega na faaogaina e lo tatou Tama, ma faasoa atu ma faasoa mai. Faafetai.."AUE UA MALIU LE TOA, E LE'I MĀUMAU A'UPEGA A AKIEPIKOPO ALAPATI LUI MATAEILIGA. "

SOIFUA ONA O KERISO

VAUELI & VERONIKA TOLOVA'A (FKS)

ASO SA O LE PENETEKOSO – May 28th.

O le aso Sa o le Penetekoso o le sulufaga i le Agaga Pa'ia. I upu mai le faitauga muamua o le asō mai le Galuega a Aposetolo, “Ona fa’afuse’i mai lea o le ta’alili mai le lagi, peisea’i o le matagi ua agi tele mai, ua tumu ai le fale sa latou nonofo ai. Ua iloa fo’i e i latou o laulaufaiva peisea’i o le afi ua vaevaeina, ua nofo i o latou luga ta’ito’atasi. Ua fa’atutumuina fo’i i latou uma i le Agaga Pa’ia, ua afua ai ona tautala i gagana ‘ese’ese, pei ona foa’iina mai e le Agaga o le gagana iā te i latou...” Ona fa’amausalī ma fa’amalosi’auina le au Aposetolo, o ta’ita’i a le Ekalesia fou ua fa’avaeina a Keriso.

Ae na fa’aafio e Keriso le Agaga Pa’ia i nisi o taimi. I le afiafi o le aso Sa o le Eseta na fa’aali ai Keriso i le au Aposetolo. Na ia mānava atu iā i latou ma fa’apea atu, “Ia outou talia le Agaga Pa’ia. O i latou uma lava tou te fa’amagaloina ai a latou agasala, e fa’amagaloina ia iā i latou; o i latou uma lava tou te tu’u pea i ai a latou agasala, e tupu pea lava ia.” I nei upu na fa’avae ai e Keriso le Sakalameta o le Fa’aleleiga. Sa ia avatu i le au Aposetolo le mana e fa’amagalo ai agasala. Ae e le’i tu’u atua lenei paoa na o latou, ae fa’apea a latou suli na mulimuli mai, o epikopo ma ositaulaga i le Ekalesia Katoliko.

O se tasi o poloa’iga a le Ekalesia ua noatia ai Katoliko uma e o atu e fai kofesio fa’atasi i le tausaga; o le isi e mana’omia Katoliko uma e talia le Komunio Pa’ia i le vaitau o le Eseta, le va o le aso Sa muamua o le Fagafulu ma le aso Sa o le Tasitolu Pa’ia, le aso Sa e soso’o ai. O nei poloa’iga e lua ua tu’u fa’atasi ua ta’ua o se “Tiute o le Eseta” a se tasi.

Le Tinā Pa’ia le Ekalesia na fa’atupuina nei poloa’iga e lē mo le una’ia o se tasi e faia se mea e lē talafeagai ae ia iloina tatou te mana’omiaina le kalasia a nei sakalameta. Ae maise lava le Togisala ma le Eukalisitā Pa’ia. Ua manatu le Ekalesia a tatou lē amana’iaina nei Sakalameta mo le sili atu o le tausaga o se a’afiaga leaga fa’aleagaga o le a tupu iā i tatou.

Maria, le Tinā o le Ekalesia (29 Me)

Aiseā ua tatou fa’amanatu (patipatia) ai Maria o le Tinā o le Ekalesia?

O le a’ a fa’atelosia o lenei fa’aupuga sa maua mai le Ekalesia anamua. O Tamā o le Ekalesia, o epikopo ale ulua’i seneturi, e pa’ia ma su’esu’e, e masani ona ta’ua Maria o le Eva Fou. E pei o le fafine o Eva “o le tinā o mea ola uma” Kenese 3: 20), o le Fafine o Maria o le tinā o latou o lo’o ola iā Keriso. I le tusi o Fa’aliga 12: 17, fai mai Sagato Ioane “o lana fanau, o e ua tausi i poloa’iga a le Atua ma ua taofi le mau iā Iesu.”

Na tuputupu a’e lenei fa’aupuga fa’apitoa “Tinā o le Ekalesia” i le vaitau ole 20 ma le 21 o seneturi. I le tausaga 2018 na fa’aopopo i ai e Pope Faranisisi le sulufaga i lalo o lea fa’aupuga ma le fa’amanatuina o le Penetekoso – ua fuafuaina o le aso fanau a le Ekalesia. I le tausaga nei 2023 o le fa’amanatuina o le aso 29 o Me.

O le a le uiga o le Tinā o le Ekalesia? Fai mai Sagato Ioane Paulo 11, o le fa’aupuga “Tinā o le Ekalesia”...ua atagia mai ai le talitonuga maumaututū a le fa’atuatuga Kerisiano, ua va’aia Maria e lē na o se Tinā o le tagata o Keriso, ae fa’apea fo’i le ‘au fa’atuatua. O ia ua maitauina o le tinā o le fa’aolataga, ola ma le Ekalesia, tinā o le ‘au lave’ ai ma le tinā o lē ola, ua tatau ai le folafolaina o le Tinā o le Ekalesia.

O le aso Sulufaga o le aso Gafua mulimuli mai le fa’amanatuina o le Penetekoso.

O le fa’amanatuina o Maria, le Tinā o le Ekalesia, ua patipatia i le aso Gafua mulimuli mai le sulufaga o le Penetekoso, ua tatou patipatia ai le aso fanau a le Ekalesia, ma le fa’amanatuina o Maria, Tinā ole Ekalesia, o Katoliko ua patipatia le tulaga o Maria, o le Tinā a lo tatou Ali’i, o le feso’ota’iga lelei a le Ekalesia i lona Tinā.

O le a le uiga o le fa’aupuga: Mater Ecclesiae?

Mater Ecclesiae o le Latina mo le “Tinā o le Ekalesia” O [Maria] o le tinā po o fea lava o [Iesu] o le

Maria, le Tinā o le Ekalesia (29 Me)

Fa'aola ma le fa'auluuluga o le Tino Misitelio.” – *Kapite a le Ekalesia Katoliko* (parakalafa 973). O maua i le Tusi Pa'ia le fa'aupuga “Tinā o le Ekalesia? O le fa'aupuga “Tinā o le Ekalesia” fa'atoā talu ai nei ona avatu iā Maria, ua fa'amatala mai ai le va feagai ai fa'aletinā ale Taupou Pa'ia ma le Ekalesia e pei ona fa'aalia i nisi o tusitusiga mai le Feagaiga Fou.

Tali mai le Fa'aliga, na vala'auina Maria, e avatu lana ioega po lona loto malie i le sau o le malō fa'amesia, o le a fa'ataunu'uina fa'atasi ma le fa'avaeina o le Ekalesia.

A o i ai i Kana na fai atu Maria i lona Alo e fa'aoga lona mana fa'amesia, sa ia faia se sao fa'avae i le totoina o le fa'atuatua i le ulua'i fa'apotopotoga o so'o, ma sa ia 'au atu i le amataina o le malō o le Atua, ua i ai lona “fatu” ma le “amataga” i le Ekalesia (cf. *Lumen gentium*, n.5).

I Kalevalio, na tu'ufa'atasi e Maria o ia lava i le faitaulaga a lona Alo ma faia lana sao fa'atinā i le galuega o le fa'aolataga, na avea ma mafatiaga ma tigā, le fanau fou mai o le tagata fou.

I le fai atu o upu “Fafine, fa'auta o lau tama” iā Maria, o Lē ua fa'akoluseina ua ofo atu lona itū fa'atinā i le galuega o le fa'aolataga, na fa'atinoina mai i le fa'atigā, le fanau mai o le tagata fou.

I le fai atu i upu “Fafine, fa'auta o lau tama” iā Maria, o Lē ua Fa'akoluseina ua folafolaina lona itu fa'atinā e le gata i le va feagai ai ma le Aposetolo o Ioane ae fa'apea i so'o uma lava. O le Tusi Evagelia fo'i ia, i le fai atu e tatau ona maliu Iesu “ia fa'apotopotoina ia fa'atasi le fanau ale Atua ua ta'ape'ape” (Ioane 11: 52), ua fa'ailoa mai ai le fanau mai o le Ekalesia o se fua o le taulaga fa'aola o lo'o feso'ota'i fa'atinā i ai Maria.

O le fai Evagelia o Sagato Luka ua ta'ua le Tinā o Iesu i le ulua'i fa'apotopotoga i Ierusalem (Galuega 1: 14). I lenei auala ua ia fa'amamafa mai ai le matafaioi fa'atinā a Maria i le fanau fou mai o le Ekalesia, ua fa'atusa i lana matafaioi i le fanau mai o le Fa'aola. O le itū fa'atinā ua avea ma elemene fa'avae o le va feagai ai a Maria ma tagata fou ua fa'aolaina.

Pe fa'apefea ona avea Maria ma Tinā o le Ekalesia?

Na filifilia e le Tamā Maria mai le anoanoa'i o fafine e avea ma tinā, e pei ona i ai le natura fa'aletagata, o Lona Alo Mamana. Ona o ia o le Tinā o Keriso i le fa'asologa fa'anatura, o ia fo'i o le Tinā a Lona Tino Misitelio, le Ekalesia, o ia o le Fa'auluuluga i le fa'asologa o kalasia.

I le Tusi a Eperu 2: 9 – 13, o lo'o fa'amanino lelei mai e lē na tusia o Iesu o lo tatou uso: Ua tatou va'aia Iesu, o lē mo se taimi na faia ua maualalo ifo i agelu, fa'apaleina i le mamalu ona o puapuagā o le maliu, e ala mai le kalasia ale Atua ia tofo ai i le maliu mo tagata uma.

Ona ua tatau mo ia, mo ai ma o ai o mea uma ua ola ai, i le aumaia o le anoanoa'i o alo i le mamalu, e tatau ona faia le amataga o la latou fa'aolataga ia lelei atoatoa e ala i puapuaga. Ona o ia na fa'apa'iaina ma latou ua fa'apa'iaina ua tasi la latou amataga. O le mea e **lē mā ai o ia ia ta'ua i latou o ona uso**, o lo'o fa'apea mai – “**Ou te ta'u atu lou suafa i o'u uso**, ou te pese atu vi'iga iā te oe i totonu o le fa'apotopotoga.”

Ma na toe fa'apea mai, ou te fa'atuatua iā te ia.” I le ma lea, “Fa'auta mai, o a'u nei ma le fanau ua foa'iina mai e le Atua iā te a'u.”

Mulimuli lava, ina ua i luga o le koluse Iesu ua tatou va'aia se taimi agamalū ina ua ia avatu Maria i le Aposetolo o Ioane. I le Evagelia a Ioane 19: 26 – 27 ua taou faitau:

“Ua silasila atu Iesu i lona tinā, ma le so'o ua alofaina e ia, ua tutū mai, ona fetalai atu lea o ia i lona tinā, “Sena e, fa'auta, o lau tama!” Ua fa'apea atu fo'i i lea so'o, “Fa'auta, o lou tinā!” Talu fo'i lea aso ua avea o ia e lea so'o i lona aiga. O le mea lea, o le Tu Masani a le Ekalesia, sau mai Aposetolo, ua a'oa'oina i tatou ina ia malamalama o le Ali'i na tu'uina atu iā Maria ma le fa'atuatua a Ona so'o, i le tagata o Sagato Ioane.

“O oe o le tinā o le ta'uamitonuina ma latou ua amiotonu, le Tinā o le fa'aleleiga ma latou ua fa'aleleia, le tinā o le fa'aolataga ma latou ua fa'aolaina.” – Sagato Asalemo

O le a le matafaioi ale Taupou o Maria i le Ekalesia?

O le Kapite a le Ekalesia Katoliko ua a'oa'oina i tatou,

O le matafaioi a Maria i le Ekalesia e lē 'ese mai lona fa'atasiga ma Keriso ma e tafe sa'o mai ai. “O le fa'atasiga a le tinā ma le Alo i le galuega ale fa'aolataga ua fa'aalia mai le taimi o le fanau taupoina o Keriso aga'i atu i lona maliu”; ua faia fa'aalia i luga atu o mea uma i le itulā o lona Puapuagā:

O le mea lea ua aga'i i luma i lana faigamalaga o le fa'atuatua, ma fa'asaoina ma le fa'atuatua i lana tu'ufa'atasia ma lona Alo i le koluse. O i'ina ua ia tū ai, faia e pei o fuafuaga mamana, tauave fa'atasi ma lona Alo i le koluse le mamafa o ona puapuagatia, fa'atasi ma ia ana faigataulaga i le loto a lona tinā, ma ioeina ma le alofa i le fasia o lenei manu'aga, fanau mai iā ia: ina ia avatu, e lenei lava Iesu Keriso i luga o le koluse, o se tinā i ona so'o ma nei upu: “Sena e, fa'auta o lau tama.”

Maria, le Tinā o le Ekalesia (29 Me)

I le mae'a ai o le afio a'e i le lagi a lona Alo, o Maria "na fesoasaoni i le amatalia o le Ekalesia i ana tatalo." I lona fa'atasi ai ma aposetolo ma nisi o fafine, "ua matou va'aia fo'i Maria i ana tatalo ole atu mo le mealofa a le Agaga, ua uma ona ia fa'amalumalu ia Maria i le Fa'aaliga."

Fa'apea, Pope Sagato Paulo VI, i le "Fa'atuatua a Tagata o le Atua," sa fa'apea mai:

Fa'atasi ai ma se noataga maumaututū ma le mautinoa i le Misitelio o le Liutino Tagata ma le Fa'aolataga, o le Taupou Pa'ia, le Imakulata, i le i'uga o lona olaga fa'alalolagi nei ua si'itia i le mamalu o le lagi tino ma le agaga ma ua pei o lona Alo toetu i le fa'atalitali mo le lumana'i o latou uma e amio tonu; ma tatou te talitonu o le Tinā Pa'ia o le Atua, le Eva Fou, Tinā ole Ekalesia, fa'aauau i le lagi lana matafaioi fa'aletinā ona o sulī a Keriso, felagolagoma'i ma le fanau ma le tuputupu a'e o le ola mamana i agaga o le au fa'aolaina.

Tatou te talitonu o le Tinā Pa'ia a le Atua, le Eva Fou, Tinā ole Ekalesia, ua fa'aauau i le lagi ona fa'atino lana matafaioi mo sulī uma a Keriso" – Sagato Pope Paulo VI.

Aiseā i le Ekalesia lava ia ona ta'ua o le Tinā?

I se Aofiaga Lauatele i le 2013, sa su'esu'e ai e Pope Faranisisi le uiga o le Ekalesia o le avea ma o tatou "Tinā."

O nisi o fa'atusa na filifilia e le Fonotaga a le Vatikano Lua e fesoasaoni iā i tatou e malamalamaina lelei le natura a le Ekalesia, ua i ai lenā "tinā": o le Ekalesia o la tatou tinā i le fa'atuatua, i le olaga ofofogia (cf. Dogmatic Constitution Lumen Gentium,). O se tasi o fa'atusa e fa'aoga so'o e Tamā o le Ekalesia i ulua'i seneturi ma e manatu e aogā mo i tatou fo'i. O se tasi o fa'atusa matagofie a le Ekalesia: Tinā Ekalesia! O le a le manatu ma o le a le auala ua ta'ua ai le Ekalesia o le tinā? Tatou te amata mai le moni o le tofiga tagata fa'atinā: O a mea e avea ai ma tinā?

Muamua o se tinā e fa'atupuina le ola, ua ia tauavea le tamaitiiti i lona manava mo le 9 masina ona momoli atu lea o ia i le ola, fanau mai o ia. Ua fa'apenā le Ekalesia: ua ia fanau mai i tatou i le fa'atuatua, e ala i le galuega a le Agaga Pa'ia ua faia o ia ma 'ele'ele lafulemū, e pei o le Taupou o Maria. O le Ekalesia ma le Taupou o Maria o tinā, o la'ua uma; o le fa'aupuga ua faia i le Ekalesia e mafai fo'i ona faia i le Tatou Tama'ita'i ma o le a se mea e ta'ua ai le Tama'ita'i e mafai fo'i ona faia i le Ekalesia!

O se tinā e lē muta i le na o le fanau mai; fa'atasi ai ma le fa'aeteete e fesoasaoni i lana fanau ina ia tuputupu a'e, avatu i ai le susu, fafaga iā i latou, a'oa'o iā i latou ala o le olaga, fa'atasi ma i latou i lana tausiga, fa'apea lona naunauta'iga, ma lona alofa, e o'o lava ua matutua i latou. Ma i lenei ua ia iloaina fo'i e fa'atonutonu i latou, fa'amagalō iā i latou ma malamalamaina i latou. Ua ia iloaina pe fa'apefea ona latalata iā i latou i taimi o ma'i ma mafatiaga. I se isi fa'aupuga, o se tinā lelei e fesoasaoni i lana fanau ina ia malamlama lelei iā i latou lava. O le Ekalesia e pei o se tinā lelei e faia e pei ona fa'apea: ua fa'atasi mai i le atina'eina o tatou i le fa'aioaina mai iā i tatou o le Ūpu a le Atua, o le malamalama e ta'ita'iina le ala o le olaga Kerisiano; ua ia fa'atonutonu Sakalameta. Ua ia fafaga i tatou i le Eukalisitia, ua ia aumaia iā i tatou le fa'amagaloga ale Atua e ala mai i le Sakalameta o le Togisala, ua ia fesoasaoni iā i tatou i taimi o fa'ama'i i le Fa'apa'iaina o le ma'i. O le Ekalesia ua faimalaga ma i tatou i o tatou olaga atoa o le fa'atuatua, i o tatou olaga Kerisiano atoa...

O se manatu pu'upu'u lona tolu. I seneturi muamua a le Ekalesia, e tasi se mea sa manino lelei: o le Ekalesia, a o avea ma tinā o Kerisiano, a o "faia" Kerisiano, sa fa'apea fo'i na "faia" e i latou. O le Ekalesia e lē 'ese mai ma tatou, ae e tatau ona va'aia o se atoaga a le au fa'atuatua, e pei o "tatou" o Kerisiano: o a'u, o 'oe, o tatou o vaega uma a le Ekalesia. Sa tusia e Sagato Ierome: O le Ekalesia a Keriso e lē o se isi lava mea i lo agaga o latou ua talitonu iā Keriso" O lea mea lea o le tulaga fa'atinā a le Ekalesia o lo'o olaina e tatou uma, faife'au ma le au fa'atuatua.

ASO SA LIMA O LE ESETA

I luma mai o lona tu'ua o lenei lalolagi, sa fa'atofa atu Iesu i ona so'o ua matata'u i le manatu o le tu'ua o latou ma le leai o se ta'ita'i. I le tau fa'afifilemūina o a latou popolega, sa ia fai atu iā i latou e 'aua le popole i lona alu'ese atu ona e alu e sauniuni se nofoaga mo latou i le fale a lona Tamā. Fa'atasi ai ma upu o fa'amafanafanaga ma fa'atonuga ua ia ofoina atu iā i latou se fa'aleleiga

ASO SA LIMA O LE ESETA

tonu mo a latou fa'afitauli. E tatau ona latou fa'atuatua i le Atua ma fa'amoemoe iā te ia. Ua fa'amatalaina e Iesu o ia lava e ta'ita'ia le ala i le Atua le Tamā ma tusia se āta o le lagi o se nofoaga e avanoa tele e i ai le nofoaga mo tagata uma. O le tala lelei e lē afaina lava po o ai tatou e i ai lava se nofoaga o lo'o fa'atalitali mai i le malō.

Ona o tatou o Kerisiano ua tatou va'aia le olaga o se faigā malaga aga'i atu i le fale o le Tamā – o se faigamalaga i le aiga. O se auala e faigatā e ui atu i fa'afitauli o lenei lalolagi, fa'atasi ai ma faigataulaga lē ma'alofia, puapuagātia ma fa'anoanoaga. O le ala atu i le Tamā e umi toe vāiti e itiiti le mafanafana ma le tele o galuega mamafa. Na savalia e Iesu ma ina ia tapasāina lelei tatou te mana'omiaina lana ta'ita'iga. O ia o le ala, le moni ma le ola. I le fa'amasinoga uma o le olaga o ia le tagata e fesoasoani iā i tatou e faia le malaga o le fa'atuatua e fa'asinoia i tatou i lo tatou taunu'uga. A i ai i le popolega o le taimi nei o la tatou va'ai o le a aga'i ua na o fa'afitauli o le a ta'aia i tatou mai so'o se itū – o se tamaitiiti ma'i, o se pili e le'i totogiina, se pa'aga e malosi i le ava malosi, leai se galuega ma le atuatuvaale – o se lisi e lē gata, o lona i ai ma lona mana ua tatou maua ai le fa'amalosi'au ma le malosi. Ae ui i le fa'anoanoa o tatou tulaga, o le fa'atuatua iā Iesu Keriso o le a motusia ai le taofiofi o le manatu ma le popole ua fa'atinoina iā i tatou. Afai tatou te talitonu i lenei folafolaga a Keriso – 'aua ne'i fa'apopoleina o tatou loto' – o le tele o le vevesi ma le pisi o le a alu 'ese atu ma o tatou olaga.

O le tali a Keriso i le fa'anaunau a Filipino e fia va'ai i foliga o le Atua, 'Sa ou fa'atasi ma outou i nei taimi ma e te le'i iloaina lava a'u?' o se mea'ai mo mafauauga. E le moni 'ea o lo'o tatou i ai nei i se tulaga fa'aleagaga o le fa'anefu e masani ona tatou lē maitauina Iesu o ai moni o ia? E faigata ona lagona le musumusu lemū o le leo o le Atua i se lalolagi o le pisi ma le vevesi vaganā ua tatou fa'atupuina ni taimi o le leai o se pisa ua mafai ai ona tatou tatala o tatou mafaufau ma loto. A tatou maua le avanoa ma le taimi i aso ta'itasi e lagonaina ai le afio ai o le Atua i tatalo o le a mafai ai ona tatou va'ai ma le malamalama i le tuana'i ma fa'atasi ai ma le fa'amoemoe ma le mafanafana aga'i i le lumana'i. Ona amata ai lea ona tatou iloaina le filemū ma le olioli sa mana'o mo i tatou e mauaina ina ua ia fai mai, 'Aua ne'i fa'apopoleina o outou loto.

ASO SA ONO O LE ESETA

O se taimi loloto ua tau iā ia ua fa'amaumauina ina ua tautala atu Iesu i le potu i luga le mea o lo'o ia patipatia ai le Tausama'aga Mulimuli ma ana uō mamae. O lana talanoaga o lo'o fa'a'au i lona ia olaga ma o lo'o talanoa atu e uiga i le Tamā, e mafana lelei le la mafutaga. Ua ia fa'asino i aposetolo, o ana fa'auō, e pei o ni tamaiti ma se folafolaga fa'amafanafana i lona tu'ua o latou e le tu'ua o ni fanau e leai ni matua ae o le a auina mai iā i latou lona Agaga. O se tapenaga mamao mo le Penetekoso ma le fa'avaeina o le ekalesia, pe a manava mai le Agaga Pa'ia o le a suia i latou ma avea o ni tala'i ma a'oa'o e lē fefefe ua tu'uina atu i ai ma le fa'atuatua le misiona o le tala'iina o le evagelia. O le mea o lo'o fuafuaina e Iesu e faia o le toe fa'aleleia o le fa'atuatua ua malepe a ona so'o mo le galuega o lo'o fa'atali mai i le uma o le toetu.

E le'i tu'ua e Iesu le au aposetolo e tauivi ma le olaga Kerisiano e aunoa ma le fesoasoani a le Agaga Pa'ia ma e le'i tu'ua fo'i i tatou e pei ona ia fai mai ai. O le afio mai o le Agaga Pa'ia e le'i fa'apito na o latou i le taimi o Iesu. O le Agaga Pa'ia o se tagata moni e alofa ma tausi iā i tatou ma o lo tatou malosi ma le fa'alototeleina i taimi o tofotofoga, e pei ona i ai i taimi o le au aposetolo.

O lo'o i ai se misitelio tele o le fa'amoemoe o lo'o i totonu o le evagelia o le asō ma e tatau ona tatou fa'amalosi'au mai ai. O le ekalesia e le'i fa'ate'aina mai le moni o le Atua. I le Agaga Pa'ia ua tatou maua i ai se fesoasoani ma se fa'amafanafanaga ua faia Iesu e fa'atasi pea ma augatupulaga ta'itasi i tagata uma iā latou tulaga ta'itasi. Ae ia manatua, o le Agaga Pa'ia e lē sau e aunoa ma le fa'aילוaina pe fa'amalosi'au ona ulufale mai i se loto o se tagata.

O Iesu ua mafai ona fa'asa'olotoina ma lavea'i i latou ua sa'ili ina ia lavea'iina. O le a tatou talia le agaga ale Ali'i ma tuputupu a'e lo tatou iloaina o Iesu pe a tatou talosaga atu ai i tatalo ma mulimulita'i le Tulafono a le Atua i le tausia o ana poloa'iga.

E fa'afā a o faia le Tausama'aga Mulimuli na fai mai ai Keriso: "Afai tou te alolofa mai iā te a'u, ia outou tausi mai i a'u poloa'iga." Ua vala'auina i tatou e fa'aילוa lo tatou fa'amaoni i le tumau ai pea

ASO SA LIMA O LE ESETA

i le fa'atuatua. Ua na o latou ua usita'i i le faia o lona finagalo e mafai ona lagonaina le atoaga o le Agaga. O uiga o le evagelia e lē o ni manumalō faigofie. I le tauiviga e atina'e se lalolagi ua sili atu o tatou o ni mea faigaluega ua tu'uina mai i ai ni taliga matala, mata ma loto i mea e lelei, moni ma le matagofie i lona malō. Ua tatou faia lenei i le ola ai o ni olaga ua lelei tele i ni auala e lē maofa tele. Afai tatou te manana'o e tu'u atu o tatou olaga i ona lima, o le a ia talia ma fa'amanuia i latou ma faia se aogā o latou ua sili atu i o tatou fa'amoemoega.

Afio o Iesu i le Lagi - Me 21st.

O le fa'atofā i se tasi e alofagia e lē faigofie, ma o se mea tatou te le'i masani atoa ai lava. O le Si'itiaga i le lagi ua fa'ailoga ai le i'uga o le misiona fa'alalo nei a Keriso ma lona toe fo'i i le mamalu i lona Tamā. Ua ia ausia le galuega na auina mai ai o ia e faia. A o olioli le lagi ma fa'afeiloa'i le taunu'u atu o le Ali'i ua si'itia i le lagi, o aposetolo ua fa'alogoia le fa'anoanoa loloto i o latou loto i lona malaga 'ese atu. Ae ui i lea, o ana upu mulimuli lava, 'ia outou o atu e fai nu'u uma ma so'o,' a o tumu i le mafanafana ae fa'avavevave i le uiga. E lē gata e lē o tu'ua i latou e Iesu po le fa'ate'aina 'ese mai i latou ma ia ae ua tu'uina atu ma le fa'atuatuga le tala'iga o le fa'aioaina o le alofa o le Atua le Tamā, e ala i olaga e lē fa'apito ae fiasia i le 'au'auna atu i isi. I le lē 'au atu ai o Iesu e ao i le au so'o ona malaga atu i le lumana'i ma le loto tele. Ua i ai la latou matafaioi taūa e faia i le fa'aioa atu o le fa'aolataga na manumalō ai Keriso i luga i Kalevalio, i le suia o le maliu i le tafa o āta i se olaga fou. E le toe i ai Iesu i se tino tagata ae o lona nofoaga o le a tau'avea e le Agaga Pa'ia o le a ave ma a latou ta'iala ma malosi a o latou faimalaga atu i lenei olaga.

Afai tatou te tomanatu ai i o tatou loto le uiga o lenei sulufaga tele atonu o le a tatou mauaina mai se mafanafana ua aumai e le Atua iā i tatou ona o le Si'itiaga i le Lagi ua mata'itu i mea e tataua ona tatou faia ina ia fa'atasi ai ma Keriso e fa'avavau. O le mea ua ia alu atu i ai tatou te fa'amoemoe e mulimuli atu i ai. E pei o aposetolo, o tatou ua i le ogatotonu o le nofoaga ma o la tatou vala'au o le 'au'aunaga fo'i. Tatou te fa'aauau le galuega a latou na muamua atu iā i tatou ma fesoasoani e atina'e le malō o Keriso. I se lalolagi ua tumu i tagata e leai ni aiga ma ni galuega tatou liliu le fa'anoanoaga i le fiasia i le ave ma ana upu fa'amafanafana ma ona foliga fiasia. Atonu o tatou olaga ua pau lea o le tusi o evagelia ua tatala atu mo tagata uma e faitau ai. O ai i tatou, ua leo tele atu i lo mea ua tatou faia pe tautala atu ai. O lo'o ia fa'amoemoe mai iā i tatou. O la tatou tatalo ia fa'afou i totonu o tatou le galuega a le Agaga ina ia tatou iloa le mea moni ma maua ai le malosi e faia ai le mea tonu.

O LE PESE A LE AUAUNA - 'O LOU TINĀ' (fa'aauau mai lomiga talu ai)

'Ua silasila atu Iesu i lona tinā ma le so'o ua alofagia e ia, ua tutū mai, ona fetalai atu lea o ia i lona tinā, "Sena e, fa'auta o lau tama!" Ua fa'apea atu fo'i i lea so'o;" Fa'auta, o lou tinā!" Talu fo'i lea itu aso ua ave o ia e lea so'o i lona aiga' (Ioane 19: 26 – 27).

Ua ia iloaina o lona maliu ua aga'i mai, o Iesu, o le fa'auluuluga o se aiga to'aitiiti, ua avatu lona tinā, ma le fa'atuatuga i lana uo sili ma le fa'atuatuga tele, le so'o taupouina, Ioane. O mea ua faia e se ali'i mafaufauina i lona moega o le oti, ua faia e Keriso i luga o le aletale o le Koluse, ma ua ia faia ma le agamalū uiga 'ese. O ana upu ma gaioga, e ui i lea, e i ai se uiga laua'itele; ma o lo'o fa'aioaina mai lea e upu na faia ma le fa'aeteete a le tusi. O le evagelia a Ioane ua fai mai na va'ai atu Iesu i 'lona tinā'. Ina ua ia fai atu iā te ia, sa ia vala'auina o ia 'Sena e'. E le gata sa ia fai atu iā te ia e le gata o lona tinā, ae o se 'fafine' o lo'o fa'auiga i ai le upu mai le ulua'i evagelia i le Kenese, mataupu tolu o lo'o ta'ua mai ai. Ua tatou va'aia lenei uiga fa'aperofeta i le upu 'fafine' muamua, i le i ai o se vaega fa'atofā mamao a Maria i le ulua'i vavega a Iesu. E le gata i le tu'uina atu ma le fa'atuatuga o lona tinā iā Ioane ae na vala'auina Ioane e va'ai lona tinā i le 'fafine' o lo'o valo'ia i le tusi a Kenese, ua fa'amanino mai ai e Iesu o lenei ua ia tautala mai i le tulaga o le aiga fou ua ave ai

O LE PESE A LE AUAUNA - 'O LOU TINĀ'

o ia ma Atamu fou, le fa'auluuluga, ma o lona tinā le Eva fou, ua i ai se matafaioi uiga 'ese.

Ua vala'auina i tatou e le molimau a Iesu e fa'aaloalo i lona tulaga fa'atinā fa'aleagaga. I le fa'aaloaloga o lenei matafaioi ma le tala'iga a Maria, folafolaina i le taimi o le esoto tele ina ua foa'i mai e Iesu lona lava ia ola mo tataou i luga o le Koluse, e lē mafai ona tatou fa'agaloina le aofiaga o le tu'u'eseina fa'apea le olaga o le sosola 'ese na mulimuli mai. O le mea lea, ina ua vala'auina i tatou e Ioane e va'ai iā Maria o lo tatou tinā, tatou te tutū ma le fa'aaloalo loloto i luma o le Eva fou, le tinā o le ola, le fa'aailoga maoa'e o lo'o talanoa mai ai le Apolokalifa.

Tatou te alolofa i lo tatou tinā i le alofa a Iesu, ma tatou te alolofa iā te ia ma le fa'afetai tele ona ua ia aumaia i tatou i le olaga i tigā o le fanau mai na puapuagatia ai Keriso lava ia i luga o le Koluse ma na puapuagatia ai fo'i o ia.

O le tofi fa'atinā fa'aleagaga a Maria ua tu'u fa'atasia ai i tatou i se auala fa'apitoa i le tutū fa'atasi uma ma fa'amaopo mai le fa'aolataga ua mauaina lona amataga, ogatotonu ma le fa'atumutumuga iā Iesu Keriso. Ua tatau ai lo tatou fa'aaloaloina o Maria o le Tinā o le Ekalesia. Ma tatou te fa'aaloaloina moni iā te ia pe a tatou ola ai atoatoa le faiga lavea'i, tauave le avega ale isi, talosaga ma puapuga o le a tasi mea uma i le alofa o le Atua.

Matou te fa'afetai iā te oe, le tamā i le lagi, ina ua e aumai
mea uma iā i matou

iā Iesu Keriso, lou Alo e to'atasi lava,
lo matou Puluvaaga ma Fa'aola.

Ma matou te fa'afetai atu iā te oe ina ua e avatu iā te ia
Maria o se 'au'auna o le fa'aolataga, le Eva fou,
le tinā o le ola.

Ma o matou loto ua fa'atumulia i le fa'afetai
ua e foa'i mai o ia iā i matou i se tulaga fa'atinā fa'aleagaga uiga 'ese.
Auina mai lou Agaga Pa'ia i luga o i matou,
ina ia fa'atasi ai ma Maria ma matou ola ai fa'atasi i le fa'atuatua,
fa'amoemoe ma le alofa,
ma fua mai ai ni fua mo le ola o le lalolagi.

Maria e, Tinā o le Atua, lo matou tinā,
tatalo mo matou nei ma le itulā o lo matou oti
ina ia matou vivi'i pea lou Alo Iesu Keriso
mo lana fa'aolataga o le tagata,

ma ola ai le misitelio o le lavea'i lotogatasi,
ma fa'asa'olotoina ai lea mai le malaia ma le mata'u o le oti. Amene.

Fa'atomuaga - O le evagelia o se tala lelei

E le'i leva tele atu o le uiga o le va'aiga o Evagelia e fa na tusia o ni tala'aga pupu'u a Iesu, ina ua fa'atasia i le tasi ma le isi ua maua mai ai se fa'amatalaga a'ia'i o lona olaga ma lana tala'iga e pei sa i ai. O lenei va'aiga o mea e aofia ai se evagelia e seāseā faia se fa'amasinoga tonu iā i latou sa tusia po a latou fuafuaga, ae ui i lea o lo'o manino lelei mai o le au tusi evgelia e le'i manatu e tusia se tala'aga o Iesu i se manatu fa'aonapo nei, e le'i manatu o i ai se mana'omia e faia lea. O la latou fa'amoemoe autū o le fa'amautinoa o latou e faitaua a latou galuega o le a malamalama lelei i le uiga o Iesu o lē na fa'akoluseina ma toetū e tatau ona i ai i o latou olaga.

Fa'atomuaga - O le evagelia o se tala lelei

O le moni tele o lo'o aumai e tusitusiga a le Feagaiga Fou o Iesu ua toetū ma, e pei ona folafolaina mai, o lo'o fa'atasi ai ma ana fa'apotopotoga, faia le poloa'iga lava e tasi mo le suiga o loto e pei ona ia faia i taimi o lona soifuaga i le lalolagi nei, folafolaina le fe'au lava e tasi o le alofa ma le fa'aleleiga mo latou ua sauni e fa'alogo. O nei mana'oga ma lenei ofo ua moni i le va'aia iā Iesu lava ia ua fa'aalia i lona lava olaga le a'afiaga o lana fe'au ma na fa'apaleina i le mamalu ma le fa'aeaea e le Tamā. O mea uma sa ia fai mai ai ma faia a o fa'atasi ma i latou ua va'aia i le malamalama o lenei i'uga mamalu, ma le uiga atoa o lona olaga o lenei ua fa'aalia maia mo le taimi muamua, e o'o lava mo latou sa mulimuli iā te ia mai le amataga. O lenei le uiga, fa'amalamalamaina e le poto masani o le Eseta, ua pue'pu'eina e evagelia mo i tatou.

I se manatu fa'avae ua na le tasi le Evagelia, ae 'ese'ese tulaga ma tala'aga ua si'itia ai i fa'afitauli 'ese'ese mo latou sa fa'alogo i le tala lelei e uiga ia Iesu. O le au liliu mai le talitonuga Iutaia sa feagai ma ni fa'afitauli 'ese'ese mai Kerisiano mai nu'u'ese, o le to'atele o latou o ni tagata fa'aanu'ua a le sosaiete mai 'a'ai tetele ale malo o Roma. E le fa'ate'ia ai la tatou ua maua ai nei fa'amatalaga 'ese'ese e fa o le evagelia e tasi, e ta'ito'atasi mai talitonuga ma tala'aga 'ese'ese ma ta'ito'atasi ua fa'ailoa atu i tulaga 'ese'ese a le Ekalesia. Ua malilie uma i le taūa o Iesu na maliu i le alofa mo le tagata na toe fa'atūina e le Tamā, ae o evagelia ta'itasi ua filifilia ma fa'aoga ana upu ma ana amioga e fa'amatala ai le uiga o le fa'atuatua mo le au faitau fa'apitoa. O le tulaga a lenei Ekalesia ola i tua o evagelia ta'itasi ua avea ai i latou o ni tusitusiga taūa mo tatou i aso nei. A tatou su'esu'e i ai mai lenei va'aiga o le a tatou mauaina o le tele o a tatou fa'afitauli fa'apea le Ekalesia e tai tutusa ma a latou, ma o tatou fo'i e tataua ona sau i se malamalama'aga i le fe'au a le Evagelia i ni tulaga tutusa. A o tatou taumafai e toe pu'epu'e mai le fe'au a le Evagelia i lenei vaitausaga o le fa'afouga, o le su'esu'eina o le evagelia e tataua ona fa'asagatau i tatou ma le tagata o le Keriso toetū, fa'amasainoina ma lavea'ina i tatou i le ofoina mai o le matafaioi o le mauina o le ola ma le Atua e pei ona ia mauaina. E le'i fuafuaina lava ina ia avea o ni fa'amatalaga o se olaga fa'aa'oa'oga a se tagata mai taimi ua tuana'i, e lē afaina o lenā olaga o se fa'aosofiaina.

TOMUAGA – Mataio 1: 1 – 2: 23

Mataio 1: 1 – 25. O le gafa a Iesu

O le Evagelia a Maleko, o lo'o ta'oto i luma o Mataio a o ia tusia lana Evagelia, na amata i le fa'aaliga o Iesu i lona papatisoga. Mo Mataio e lē lava lea; sa ia mana'o e fa'aalia pe va'aia Iesu o le a avea ma Mesia e o'o lava i tala o lona fanau mai ma le la'ititi. O le mea sa ia maua mai ai nei tala e lē o iloa po ofea, ona e maitauina e lē o fa'ailoaina maia e Mareko ni tala'aga o ia fa'amatalaga ma o Luka ua fa'asoa ma i latou na o vaega taūa lava. E lē masalomia o Mataio o lo'o galue mai i ni fa'amaumau-ga o tu masani Kerisiano, ae o lana popolega muamua o le aumaia i luma le uiga o le fanau mai o Iesu ma lona taimi o pepe i le fa'ailoaina mai o galuega ale Atua i nei mea na tutupu. Mo lenei mafua'aga ua ia fa'amatala nei tala i se auala ua masani ai tusitusiga Iutaia, fa'ailoa mai le uiga o mea na tutupu i le tosigata atu o le mata'itū, e lē o fa'aupuga a lē na tusia ae i le auala ua ia fa'amatala ai le tala, ina ia o gatasi mea na tutupu mai le Feagaiga Tuai ma tu masani a Iutaia. O nisi o taimi ua ta'ua tusitusiga pa'ia o lo'o ia fa'asino i ai, ae masani i lana evagelia atoa ua na ona ta'ua o ia mea, ua tu'ua ai lē o lo'o faitaua i le loloto o le feagaiga tuai e talisapaia le fa'atusa.

Fa'atomuaga - O le evagelia o se tala lelei

O le au tusi evagelia uma o Iutaia i le mafaufau, ae o Mataio ua sili atu. O le au tusi evagelia e muamua popole e fa'ailoa mai o Iesu o le Mesia sa fa'atalitali i ai tagata Iutaia, o lē o le a toe fa'aleleia mea uma i o latou tulaga fa'aparataiso, ina ia fa'ataunu'ui-na ai folafolaga ale Atua i le lalolagi nei, i le toe fa'aola maia o le malō lelei o le olioli ma le anoanoa'i. O lenei galuega sa le'i faigofie, ona o fa'amoemoega a tagata Iutaia ua na o mea fa'aletino: sa manatu o le fouvalega fa'amesia o le a ave'ese atu ai le amo o le itagia e le au Roma ma fa'avae ai se malō tele a tagata Iutaia. O latou o tagata mai Asuia i Sasa'e, ma o la latou va'aiga o le manuia ma le anoanoa'i e le'i taofiofia ai i latou i le fa'amoemoega o le faiga'ai e fa'avavau e aunoa ma se galue malosi i lalo o le mugālā. O le mea lea, o Iesu, ma le au tusi evagelia na mulimuli mai, sa feagai atu ma ni galuega se lua o le fa'ailoaina o Iesu ole Mesia sa fa'amoemoeina ma o le fa'afouina o mea uma sa ia aumaia sa lē o gatasi ma a latou fa'amoemoega. O le musuā o le anoanoa'i o tagata Iutaia e ave'ese atu o latou popolega ma fetu'utu'una'i i le moni e le'i manatu i ai na ta'ita'ia aga'i atu ai i le fa'akoluseina.

O le galuega muamua a Mataio la o le fa'ailoa mai o Iesu o le Mesia. O le tasi o manatu autū i le fa'amoemoega o le Mesia e tatau ona sau mai le laina a Tavita, ona o Tavita o se tupu lelei ale malō tu'ufa'atasi a Isaraelu ma Iutaia, o latou ia sa va'ai i ai Iesu ma le fa'anaunau. Sa folafolaina e le Ali'i o le lainā tupu a Tavita e lē muta ma o ona sulii o le a fa'avaeina se sitete o le filemū ma le fa'atauva'a i le lalolagi nei o le Tavita lona lua. Ma o i'inei lava o se faigatā sa feagai ma le tusi evagelia, ona o Iesu sa fanau mai i se taupou, ma sa leai se tamā e ala mai ai lona so'otaga i le laina a Tavita. (o le sulii mai le laina a se fafine o se manatu e maualuga lona masalomia ma e leai se molimau o Maria na sau mai le laina a Tavita). O Iesu la e aua'i i le laina a Tavita e ala atu iā Iosefo, lona tamā tausii.

10

O le mafua'aga lenei na mafua ai iā Mataio ona amata lana evagelia i le gafa umi a Iosefo, ae leai Maria. O le gafa lava ia e maualuga lona teuteuina, ua lē a'afia ai le anoanoa'i o augatupulaga ma na fuafuaina e fa'ailoa na o ni vaega itiiti e uiga iā Iosefo le atali'i a Tavita ma le atali'i a Aperamo e lē ano mai i tulaga fa'alavelave, ua na o ni faiga ua tu'ufa'atasia ai o matafaioi o numera lelei atoatoa o le fitu i piriota masani o le tala fa'asolopito: Aperamo aga'i atu ia Tavita, Tavita aga'i atu i le fa'aanu'ua i Papelonia, le fa'aanu'ua iā Keriso. E i ai le fa'amatalaga taūa: o fafine. O fafine ua ta'ua e to'afā (Tamara, Raava, Ruta, Patesepa) na feso'ota'i atu i le laina a Aperamo e ala atu i ni faiga uiga 'ese; o lo'o sauniuni Mataio mo le tulaga o le fanau mai o Iesu mai iā Maria ma le tu'uina atu i le laina a Tavita ina ia fa'apea ona faia tutusa ma le fa'asoa e tulaga uiga 'ese.

O le mafua'aga o le gafa ua fa'amanino mai e le atoaga o le tala o le vavaeina o Iesu i le aiga o Tavita. O lenei ua na o se tala fa'afuase'ia o le fanau mai o Iesu po o le ma'itaga o Maria. O le autū o lo'o fa'amanino lelei mai e lona tulaga mulimuli mai le gafa ma le fa'aupuga o lona taunu'uga mulimuli 'ma fa'aigoa iā te ia o Iesu', ona o le fa'aigoaina o se faiga lea ua fa'ailoa ai e le tamā le atali'i o ia e ana, po – i le tala lenei – fa'ate'a iā te ia o lona atali'i fai.

I le fa'amatalaina o le tala e lua ni popolega sa iā Mataio: muamua sa ia mana'o e tali le fesili, pe fa'apefea iā Iosefo ona lototele fa'alavelave i le mataupu, ma le iloaina o le tamaitiiti na āfuafuaina fa'avavega e aunoa ma se tamā fa'aletagata? I le taimi lava lea sa ia mana'o e fa'ailoa atu o le fa'ate'aina o Iesu i le fale o Tavita e le'i fa'afuase'ia ae

na fuafua lelei e le Atua. O le maitauina e Iosefo o le lē talafeagai ai o le fa'aauuina o lona fa'aipoipo atu ia Maria i le va'aiga o mea ua tupu na mafua ai le miti. E leai se fesili o le masalosalo a Iosefo i le mulilua a Maria (e ui o le la fa'aipoipoiga e le'i mae'a ona fa'ataunu'uina atoatoa, o se fa'amau Iutaia ua a'afia ai le tele o faiga o fa'aipoipoiga e pei ona i ai i ona po nei, ma o le mauaina o se tamaitiiti mai se isi tama- loa o le a va'aia o le talatane). Afai o le tulaga lenei o le a tatau iā te ia ona ta'uleagaina o ia i lo le 'fa'ate'a lemū iā te ia' ona o lona loto alofa. O le fa'amatalaga ua talafeagai pe afai o Iosefo na iloaina le foafoaina o le tamaitiiti, ma na mana'omiaina le fe'au a le agelu e 'aua le fa'ailoaina atu iā te ia ae ia fa'ailoa atu iā te ia e ui o lenei ae o le po- loa'iga a le Atua e tatau ona ia faia le tamaitiiti o lona atali'i, ma na tu'uina atu ai o ia i le fale o Tavita e ia lava i le avatu i le tamaitiiti o se igoa. E pei ona masani ai i le fa'a- Iutaia o le igoa lava ia o se valo'aga o le matafaioi a le tamaitiiti ua fa'aigoa ai...

O le a le manatu o Iesu ua fanau mai i se taupou? Ona o le mata'u i le agasala o le feusua'iga?

Aiseā lenei finauga a Mataio i le aumaia o Iesu o se Mesia? E le mafai ona tatou o 'ese mai le manatu Iutaia a lo tatou fa'atuatuaga aga'i atu i se faiga fa'aonapo nei?

...fa'aauau pea...

FAITAUGA MO LE MASINA O ME – 2023

Aso 7 Me Aso Sa 5 o le Paseka. Faitauga muamua – Galuega 6: 1 - 7: Matua: Inā filifili ia ni o outou se to'afitu e tutumu i le Agaga Pa'ia ma le potu.

Salamo 33: 1 – 2 (tali), 4 – 5 (tali), 18 – 19 (tali). Tali: Le Ali'i e, ia luga iā te i matou lou alofa, e pei ona matou fa'amoemoe iā te oe.

Faitauga lona lua – 1 Peteru 2: 4 – 9. Matua: O outou o le tupulaga ua filifilia outou, o tupu ma ositaulaga.

Aleluia, Aleluia...O a'u nei le ala, ma le upu moni, ma le ola; e lē alu atu lava se tasi i le Tamā, pe a lē ui mai iā te a'u...Aleluia.

Evagelia – Ioane 14: 1 – 12. Matua: O a'u nei le ala, ma le upu moni, ma le ola.

Tofitofiga o le Upu:

O le faitauga mai ia Sagato Peteru ma le vaega o le Evagelia ua tu'uina mai iā i tatou i le asō o lo'o manino lelei mai le fa'amamafaina: le autū atoatoa o Iesu i mea uma. 'O le Ali'i o le ma'a ola...ia outou o mai iā te ia', fai mai ai Peteru, o latou e lē talia Iesu 'o le a tautevateva ona e lē talitonu i latou'. I le Evagelia, o lo'o fa'apena fo'i ona fa'amamafa mai Iesu i lana matafaioi: 'O a'u nei le Ala, ma le Upu Moni ma le Ola, e lē alu atu lava se tasi i le Tamā, pe a lē ui mai iā te a'u.' O le Kerisiano moni e mau a'a sa'o lava i lona va feagai ai ma le Ali'i, o le mafua'aga lenā ua ofoina mai ai e nei faitauga e lua se fa'amatalaga taūa mai le faitauga a le Galuega.

I le uma ai o le Penetekoso, na tuputupu vave le fa'apotopotoga ma na tosigā mai ai le anoanoa'i o tagata 'ese'ese mai ituaiga ma aganu'u 'ese'ese; ua aumai e Luka se lisitele 'ese'ese i lana fa'amatalaga mai ulua'i tala'iga a le au aposetolo i le aso o le Penetekoso. O le fa'amatalaga e uiga i le ulua'i fa'apotopotoga ua a'afia ai le au Elenisi ma le au Eperu ua atagia mai ai lenei. O le tulaga lenei e le'i tupu i le taimi o

FAITAUGA MO LE MASINA O ME – 2023

Iesu. E fa'apea fo'i, a o i ai le vaega taūa a le Toa'sefululua i le tala'iga a le Ali'i, o le tuputupu a'e o le Ekalesia o lona uiga ua latou lē mafaia ona pulea vaega uma o le olaga ale fa'apotopotoga ae sa fa'atonotonu lelei la latou 'au'aunaga. Afai o le au aposetolo sa 'taumauga i latou lava i tatalo ma le 'au'aunaga o le upu; o isi sa mana'omiaina e 'tufatufa atu mea'ai'. (E ao ona maitauina e ui o le Toafitu na tofia e faia leni tiute, i se taimi pu'upu'u lava o Setefano ma Filipino sa tala'i ma fa'aevagelia ma le lelei tele.) O le filifilia o le to'afitu na foliga mai o le galuega ale au so'o atoa, o latou sa ia tu'uina atu sulii i le au aposetolo mo le fa'amaoniga. I mataupu muamua a le Galuega, ua toe fa'amatala e Luka le atina'e na fa'aogaina e le Ekalesia ua tuputupu a'e o se tali atu i tulaga ua suia. Ae e le'i ta'ua lava e Luka nei suiga ua na o ni suiga fa'afa'apotopotoga. Mo Luka, o ni fa'aauauina ma ulua'i fa'apotopotoga o so'o na vala'auina e le Ali'i ma filifilia ma o latou ua fa'aloaloa o latou lima i luga o le to'afitu o se fa'amausalina o leni faiga. E pei ole Ekalesia anamua, o le au fa'atuatua i onapō nei ua mana'omiaina ona su'esu'e pe fa'apefea i a'oa'oga a le evagelia ona fetu'utu'una'i ma fa'amatalaina mo le lalolagi fa'aonaponei, ae ia faia pea ma ia fa'amaoni ma le tasi o le 'ma'aola' ma le 'Ala, le Moni ma le Ola.

12

Aso 14 Me Aso Sa 6 Paseka.Faitauga muamua – Galuega 8: 5 – 8, 14 – 17. Matua: Na fa'ae'e atu o la'ua lima iā te i latou, ona maua lea e i latou le Agaga Pa'ia.

Salamo 66: 1 – 3 (tali), 4 – 5 (tali), 6 – 7 (tali), 16, 20 (tali). Tali: Le lalolagi uma e, ia outou alalaga atu i le Atua.

Faitauga lona lua – 1 Peteru 3: 15 – 18. Matua: Na fasiotia o ia i le tino, a ua fa'aolaina mai i le Agaga.

Aleluia, Aleluia... Afai e alofa mai se tasi iā te a'u, e tausia e ia la'u upu; e alofa fo'i lo'u Tamā iā te ia, e o mai fo'i i ma'ua iā te ia... Aleluia.

Evagelia – Ioane 14: 15 – 21. Matua: Ou te fai atu i le Tamā, ona foa'i mai ai lea iā te outou le tasi Fesoasaoni.

Tofitofiga o le Upu:

O se va'aiga e fa'afuse'ia le i ai o Filipino i Samaria i la tatou faitauga muamua ona o le fa'asauaina na amataina e Saulo. O le fa'apa'iaina o Setefano ma Filipino ma isi Elenisi e tauavea le matafaioi ole tufatufaina o mea'ai, na mafua ai ona latou tauaveina le tala'iga ma le fa'aevageliaina, ma na i'u ai i le tu'ima'aina o Setefano ma le fa'asalaina o le au Elenisi i Ierusalem. O se i'uga, na latou malaga 'ese atu ma ave la latou fe'au i se isi nofoaga, ma ole taumafai e tineia le Tala Lelei na ta'ita'ia i lona tuputupu a'e. O tala'iga a Filipino na sau ai ma fa'ailoga ma fa'amalologa – fa'ailoga ua toe manatua ai 'au'aunaga a Iesu lava ia. I le Tusi o Galuega, e leai se fa'asologa tumau a Luka i le meaalofa a le papatisoga ma le Agaga Pa'ia. Ua avatu le papatisoga; o le au Aposetolo ua malaga mai Ierusalem e va'ai i'uga a 'au'aunaga a Filipino ma fa'aloaloa o latou lima i tagata Samaria ina ia latou talia le Agaga Pa'ia. O le taūa moni o le matafaioi a Aposetolo o le fa'ailoa ma le tala'iga a Filipino (fa'apea ai ma isi au Elenisi) ua fa'amausalina. Ua fa'ailoa mai e Luka se fa'apotopotoga ua olaola ma

FAITAUGA MO LE MASINA O ME – 2023

aumaia tagata mai fafo (o Samaria sa va'aia e tagata Iutaia e lē o ni tagata lelei). Ae o se tasi o fa'apotopotoga ua mautū lelei ona o le papatisoga i le suafa o Iesu, ua avatua le Agaga Pa'ia i le au fa'atuatua ma ua 'au ai fa'atasi ma aposetolo. O le Evagelia a Luka o se fa'amatalaga o galuega a Iesu; o le Tusi a Galuega na tusia e Luka o se fa'asologa ua aumaia se fa'amatalaga o le misiona a le Agaga i le Ekalesia ma le ausia i le avatua o le evagelia i tulu'iga o le lalolagi. O le taūa o le Agaga Pa'ia i faitauga o le asō ua fa'amanatu mai ai iā i tatou a o tatou aga'i atu le Sulufaga o le Penetekoso, e pei o le faitauga mai le Evagelia a Ioane na folafola ai Iesu e ui o le a ia tu'ua i latou, o le Tamā o le a foa'i mai iā te outou le tasi Fesoasoani, ina ia tumau pea o ia iā te outou e fa'avavau, le Agaga o le upu Moni'. O lenā folafolaga a Iesu i le tausama'aga Mulimuli o se fa'avae tumau o le ola a le Ekalesia Kerisiano: Ou te le tu'ua outou o mātuaoti.' O le afioa ai o le Agaga Pa'ia i le olaga a le Ekalesia o se fa'amasalīna o le Ekalesia ua lē na o se fa'apotopotoga maoa'e a lenei lalolagi o lo'o ola ai i le tala'aga, ae o le tino moni a Keriso – o lona fa'atumutumuga lava pe a potopoto uma mai e patipatia le Eukalisitia.

Aso 21 Me Aso Sa 7 Paseka – AFIO A'E O IESU.

Faitauga muamua – Galuega 1: 1 – 11. Matua: Se a le mea tou te tutū ai, ma va'ava'ai i le lagi?

Salamo 47: 1 – 2 (tali), 5 – 6 (tali), 7 – 8 (tali): Tali: O lo'o afio a'e le Atua ma le alaga fiafia, o lo'o afio a'e le Ali'i ma le leo o le pu.

Faitauga lona lua – Efeso 1: 17 – 23. Matua: Ua ia fa'anofa iā te ia i lona itū taumatau i mea o i le lagi.

Aleluia, Aleluia...Ia outou o atu e fai nu'u uma lava ma so'o; ou te iā te outou i aso uma lava e o'o lava i le gata'aga o le lalolagi...Aleluia.

Evagelia – Mataio 28: 16 – 20. Matua: Ua tu'uina mai iā te a'u le pule uma lava i le lagi ma le lalolagi.

Tofitofiga o le Upu.

O fa'amatalaga o le fa'aaliga a Keriso i lona toetū e telē lona 'ese'esega mai iā Mataio, Luka ma Ioane (o le misitelio le leai o se tala mai iā Mareko) e leai se aogā e taumafai ai e tu'u fa'atasia i latou i se fa'amatalaga e tasi. I se isi va'aiga e lē o taumafai Mataio e aumai se fa'amatalaga o fa'atonuga na avatu e Keriso i le au so'o i le vaitaimi sa fa'aali ai iā i latou ae le'i si'itia i le lagi: ae ua ia fa'aupuina uma i le poloa'iga e tala'i atu i le lalolagi. Ma o le Ali'i mamalu, i le fa'aeaeaina ma le to'atasi matagofie a le mauga, na fa'aali mai ai. O le perofetaga a Tanielu sa ia tautala atu i luma o ositaulaga sili ua fa'ataunu'uina, ona 'o le pule uma lava i le lagi ma le lalolagi' ua tu'uina atu iā te ia. Ma o le pule lenei na ia auina atu ai ana avefe'au i le lalolagi atoa, ma na ia folafolaina atu i ai lona i ai ma i latou e fa'avavau, e lē i ai fa'aletino, ae o le malosia o lona mana.

O lenei fa'ai'uga o le fa'atumutumuga moni a le evagelia a Mataio: Ua va'aia manino Keriso i le fa'atulagaga ma lē ua mafai ona va'aia i le fa'aleāta o Keriso i le taimi o lona soifuaga fa'alalolagi nei. Ae o le fa'atumutumuga lava o lo'o tatala mai, ona ua fa'avaeina ai fuafuaga o le vaitaimi a le Ekalesia. I taimi o lona soifuaga fa'alalolagi nei o le tala'iga a Iesu sa na o tagata Iutaia; ma i lona maliu ma lona toetū o le suiga

FAITAUGA MO LE MASINA O ME – 2023

ua faia i le misona ale au aposetolo i nu'u uma. Ae o lo'o tumau pea o le misiona a Keriso, ona o ona sulii ua tu'uina atu i ai lona afio ai ma lona mana.

O le masalosalo o se fa'aletonu i le vaega a le tagata?

O le a se lagona ua mafai ona tatou faia i le fa'aupuga a Iesu e uiga i le pule?

Pe o iloaina e tatou Kerisiano o lo'o tatou fa'asoa i se mea e i ai lona ta'ua

fa'avanimonimo? Pe fa'aapefea i le manumalo a Keriso ona i ai lea ta'ua?

Pe fa'aapefea i se faiga matagofie ona tatou aga'i i luma ma papatiso atu i le suafa o le Tamā, Alo ma le Agaga Pa'ia?

Aso 28 Me Aso Sa Penetekoso. Faitauga muamua – Galuega 2: 1 – 11. Matua: Ua fa'atumuina i latou uma i le Agaga Pa'ia, ua afua ai ona tautala i gagana 'ese'ese.

Salamo 104: 1, 24 (Tali), 29 – 30 (tali), 31, 34 (tali). Tali: E te auina atu lou Agaga, e te toe fuata'iina fo'i le foga'ele'ele.

Faitauga lona lua – 1 Korinito 12: 3 – 7, 12 – 13. Matua: O le Agaga e to'atasi na papatisoina ai i tatou uma i le tino e tasi.

Aleluia, Aleluia... Agaga Pa'ia e, afio maia, e fa'atumuina loto o au 'au'auna, ma tutu i ai le afi o lou alofa... Aleluia.

Evagelia – Ioane 20: 19 – 23. Matua: Fa'apei ona auina mai o a'u e le Tamā, e fa'apea fo'i ona ou auina atu outou; ia outou talia le Agaga Pa'ia.

14

Tofitofiga o le Upu:

E ao ona maitauina o le va'aiga na fa'amatalaina i le faitauga muamua ma le Evagelia e tutusa – na potopoto le au so'o i le fale na lokaina. O le afio ifo o le Agaga Pa'ia ma fa'aaliga a Iesu i le au so'o na suia ai le tulaga atoatoa. O le Evagelia mai iā Ioane na faia ma le mautinoa i le 'aso muamua o le vaiaso' – o le Aso o le Eseta lenā – ma na fai atu Iesu i le au so'o 'talia le Agaga Pa'ia'. Na fa'atulaga e Luka le sau o le Agaga Pa'ia i le aso Penetekoso – o le lima sefulu aso i luma ole Paseka. O se fa'amanatuga aogā o le Misitelio Kerisiano e le o ni fa'asologa o taimi e manino lelei sitepu ae o se atoaga e leai ni so'otaga i le nofoaga na toetu ai Iesu ma le sasa'a mai o le Agaga Pa'ia o vaega uma o gaioiga e tasi a le Atua, ma o lenā gaioiga e masani o lona uiga o le gaioiga a le Tala Lelei ua sau i fafo mai o faitoto'a ua lokaina aga'i atu i le lalolagi.

I le amataga o lana Evagelia ma i le amataga o le Tusi a Galuega, e masani ona alu Luka i le gagana ma manatu ale 'Feagaiga Tuai e taula ai le magalo Kerisiano i le tala fa'asolopito i featuna'iga a le Atua ma Isaraelu. O le mea lea ina ia maua lelei le ta'ua o le Sulufaga o le Penetekoso ma mea o lo'o taumafai i ai Luka e fa'amatala mai, so'o se isi o faitaua e mana'omia ona tomanatu i sini a le Feagaiga Tuai ua ta'ua. O se auala lelei o le faia o lea o le fa'aogaina o faitauga e fa'ua ofoina mai mo le Misasa i le afiafi ma mafaufau i ai ma iloaitino le malamalama'aga ua ofoina mai e Luka. O lo'o malamalama Luka ua na o le pau fa'aupuga ma manatu ua iā ia e fa'amatala ai galuega ale Atua o upu ua sau mai i tu masani a Isaraelu, ma sa ia faia le tala o le Penetekoso fou i le gagana a Tusitusiga Pa'ia a Eperu. O le tala i le Olo i Papelu mai le Kenese ua fa'aalia ai le mimita ma le agasala a le tagata ua fa'alavelave i ai le 'ese'esega o gagana – o le fevaevae'ai e masani o se fa'aolaga o le lē au ai o le Atua – ae i le Penetekoso ua

FAITAUGA MO LE MASINA O ME—2023

suia ai lea; i le va'aiga i luga o le Mauga o Sinai se fa'aaliga o le Atua i ni va'aiga malolosi tele (cf. Eperu 12: 18 – 19), ae i le Penetekoso o leo i le fa'amatalaga a Luka o ni fa'amanuiaga; o Ponaivi Mamago a Esekielu ua fa'aalia mai ai o lē ua oti e mafai ona toe fa'atuina mai e le Agaga (mānava) a le Atua; ae o le sasa'a mai o le Agaga mai le perofeta o Ioelu ua ofoina mai se avanoa lautele i mealofa ale Atua e pei ona iloaina e le anoanoa'i o latou sa fa'alogi i le aso o le Penetekoso. O nei va'aiga uma ua ofoina maia se avanoa e sa'ilili ai le taūa o le mealofa ale Agaga na avatu i Aposetolo ma o lo'o maua e le au fa'atuatua i le Penetekoso ma aso nei. O le sasa'a mai o le Agaga i luga o le au Aposetolo e lē o se "vavega" matagofie ma uiga 'ese, ae o se fa'ataunu'uina o mea sa fuafuaina ma folafolaina mai e le Atua i taimi ua tuana'i ma ua fa'atinoina nei e le Misitelio Fa'apaseka.

Atonu ua tatou patipatia le Penetekoso – lima sefulu aso i le mae'a o le Eseta, ae o le Evagelia o le asō mai iā Ioane ua fa'a'autū i le aso Sa o le Eseta. O se fa'amanatuga aogā o le Misitelio Kerisiano e lē o se fa'atulagaina manino o la'asaga ae o se atoaga e leai ni so'otaga o lo'o i ai le Toetu a Iesu ma le sasa'a mai o le Agaga o mea uma ia o le gaoiga lava e tasi ale Atua, ma o lenā gaoiga o le *taimi nei*.





Faitauga mo le Aso Sa muamua o Iuni 2023

ASO SA TASITOLU PAIA

Faitauga Muamua – Esoto 34: 4 – 6, 8 – 9. Matua: O le Ali'i, o le Atua alofa mutimuti vale ma le alofa fua.

Pese – Tanielu 3: 52 (tali), 53 (tali), 54 (tali), 55 (tali), 56 (tali). Tali: Ia vi'ia le Ali'i ma ia fa'asilisilia i augatupulaga uma.

Faitauga lona lua – 2 Kirinito 13: 11 – 13. Matua: O le alofa tunoa o le Ali'i o Iesu Keriso, ma le alofa ole Atua, atoa ma le mafuta fa'atasi ma le Agaga Pa'ia.

Aleluia, Aleluia...O le vi'iga i le Tamā, ma le Alo ma le Agaga Pa'ia, o le Atua lava o lo'o soifua, na soifua fo'i, o le a afio mai...Aleluia.

Evagelia – Ioane 3: 16 – 18. Matua: Na auina mai e le Atua lona Atali'i, ina ia fa'aolaina le lalolagi iā te ia.

16

Aso Sa muamua	09.30am	Seatoun	Patele Maleko
7 Me 2023	11.00am	Titahi Bay	Leai se Misasa
	11.00am	Porirua	Patele Andrew
Aso Sa Lua			
14 Me 2023	12.00	Te Awakairangi – Lower Hutt (Taita & Naenae)	Patele Maleko
Aso Sa Tolu			
21 Me 2023	11.00am.	Newtown	Patele Andrew
	11.00am	Holy Family	Patele Maleko
Aso Sa Fa			
28 Me 2023	11.30am	Te Wairua Tapu – Wainui (Petone)	Patele Andrew
	11.30am	Stokes Valley	Patele Maleko

Mikaele Teofilo:

✉ m.teofilo@wn.catholic.org.nz

☎ 021 0818 5037

✉ PO Box 1937, Wellington 6140, New Zealand